

欽定四庫全書

子部

三因極一病証方論卷一



南京中医药大学图书馆版权所有

欽定四庫全書

子部五

三因極一病症方論

醫家類

提要

臣等謹案三因極一病症方論十八卷宋陳言撰言字無擇青田人是書分別三因歸於一治其說出金匱要略三因者一曰內因為七情發自臟腑形於肢體一曰外因為六慾起自經絡舍於臟腑一曰不內外因為飲食

饑飽叫呼傷氣以及虎狼毒蟲金瘡壓溺之類每類有論有方文詞典雅而理致簡該非他家鄙俚冗雜之比蘇軾傳聖散子方葉夢得避暑錄話極論其謬而不能明其所以然言亦指其通治傷寒諸症之非而獨謂其方為寒疫所不廢可謂持平吳澄集有易簡歸一方序稱近代醫方惟陳無擇議論最有根柢而其藥多不驗嚴子禮剽取其論而附以

平日所用經驗之藥則兼美矣是嚴氏濟生
方其源實出於此宋志著錄六卷陳振孫書
錄解題亦同此本分為十八卷蓋何鉅重錄
所分第二卷中太醫習業一條有五經二十
一史之語非南宋人所應見然證以諸家所
引實為原書其詞氣亦非近人所及疑校正
者不學無術但聞有二十一史之說遂妄改
古書不及攷其時代也乾隆四十四年九月

恭校上

總纂官臣紀昀臣陸錫熊臣孫士毅

總校官臣陸費墀

因極一病証方論卷一
脈經序

宋 陳言 撰

脈經

脈經之道類知
事者脈經中
之說於斯見矣醫學者
甚微妙廣大配天地
無不揆度是以聖人

示教有精微氣象之論後賢述作為太素難經之文仲
景類集於前叔和詮次於後非不昭著六朝有高陽生
者剽竊作歌訣劉元賓從而解之遂使雪曲應稀巴歌
和衆經文溺於覆沒正道翳於詖辭良可歎息今乃料
簡要義別白討論分人迎氣口以辨內外因列表裏九
道以叙傷感病証六經不昧五臟昭然識病推因如指
諸掌類明條備文畧義詳倘能留神則思過半矣

學診例

凡欲診脉先調自氣壓取病人脉息以候其遲數過與不及所謂以我醫彼智與神會則莫之敢違

凡診脉須先識脉息兩字脉者血也息者氣也脉不息動為氣使然所為長則氣治短則氣病也

凡診須識人迎氣口以辨內外因其不與人迎氣口相應為不內外因所謂關前一分人命之主

凡診先識五臟六腑本脉然後方識病脉歲主害臟氣候逆傳陰陽有時與脉為期此之謂也

凡診須認識二十四字名狀與關前一分相符推識証狀與病者相應使無差忒庶可治療

總論脉式

經云診法常以平旦陰氣未動陽氣未散飲食未進經脉未盛絡脉調勻血氣未亂乃可診有過之脉或有作為當停寧食頃俟定乃診師亦如之

釋曰停寧俟定即不可拘於平旦況倉卒病生豈待平旦學者知之

經云切脉動靜而視精明察五色觀五臟有餘不足六腑強弱形之盛衰可以參決死生之分

釋曰切脉動靜者以脉之潮會必歸於寸口三部診之左關前一分為人迎以候六淫為外所因右關前一分為氣口以候七情為內所因推其所自用背經常為不內外因三因雖分猶乃未備是以前哲類分二十四字所謂七表八裏九道七表者浮芤滑實弦緊洪八裏者微沉緩瀦遲伏濡弱九道者細數動虛

促結代革散雖名狀不同証候差別皆以人迎氣口
一分而推之與三部相應而說証故脉贊曰關前一
分人命之主左為人迎右為氣口神門斷決而在關
後而漢論亦曰人迎緊盛傷於寒以此推明若人迎
浮盛則傷風虛弱沉細為暑濕皆外所因喜則散怒
則激憂瀆思結悲緊恐沉驚動皆內所因者與何部
相應即知何經何臟受病方乃不失病機也其如診
按表裏名義情狀姑如後說但經所述謂脉者血之

府也長則氣治短則氣病數則煩心大則病進文藻
雖雅義理難尋動靜之辭有博有約博則二十四字
不濫絲毫約則浮沉遲數總括紀綱辭理粲然故知
浮為風為虛沉為濕為實遲為寒為冷數為熱為燥
風濕寒熱屬於外虛實冷燥屬於內內外既明三因
須別學者宜詳覽不可憚煩也

經中所謂視精明者蓋五臟精明聚於目精全則目
明神定則視審審視不瞭則精明敗矣直視上視眩

瞑眊瞑皆可兼脉而論病狀也

所謂察五色者乃氣之華也赤欲如帛裏朱不欲如赭白欲如鵝羽不欲如鹽青欲如蒼玉之澤不欲如藍黃欲如羅裏雄黃不欲如黃土黑欲如重漆色不欲如地蒼五色精微象見矣其壽不久也

所謂觀五臟有餘不足候之五聲者臟之音中之守也中盛則氣勝中衰則氣弱故聲如室中言者是氣之澁也言微終日乃復言者是氣之奪也譫妄不避

善惡神明之亂也鄭聲言語不相續陰陽失守也故
曰得守者生失守者死是也

所謂六腑強弱以候形之盛衰頭者精明之府頭傾
視深精神奪矣背者胸中之府背曲肩隨府將壞矣
腰者腎之府轉搖不能腎將憊矣膝者筋之府屈伸
不能筋將憊矣骨者髓之府行則振掉骨將憊矣倉
廩不藏者腸胃不固也水泉不止者膀胱不藏也得
强者生失强者死此等証狀醫者要明在脉難明惟

証易辨是故聖智垂論備教學者宜兼明之不可忽也

三部分位

三部從魚際至高骨得一寸名曰寸口從寸口至尺名曰尺澤故曰尺中寸後尺前名曰關陽出陰入以關為界又云陰得尺內一寸陽得寸內九分從寸口入六分為關分從關分又入六分為尺分故三部共得一寸九分

六經所屬

心部在左手寸口屬手少陰經與小腸手太陽經合

肝部在左手關上屬足厥陰經與膽足少陽經合

腎部在左手尺中屬足少陰經與膀胱足太陽經合

肺部在右手寸口屬手太陰經與大腸手陽明經合

脾部在右手關上屬足太陰經與胃足陽明經合

右腎在右手尺中屬手厥陰心包經與三焦手少陽經

合

手少陰之脉起於心中屬心系下膈絡小腸其支者從
心系上挾咽系目其直者復從心系却上肺出腋下下
循臑内後廉行太陰心主之後入肘内廉循臂内後廉
抵掌後銳骨之端入掌内廉循小指之内出其端

手太陽之脉起於小指之端循手外側上腕出踝中直
上循臂骨下廉出肘内側兩筋之間上循臑外廉出肩
繞肩髀交肩上入缺盆絡心循咽下膈抵胃屬小腸其
支別者從缺盆循頸上頰至目銳眥却入耳中其支者